

خطِ پولسِ بَلَدِه ايمانداراي کولسي

پيشگفتار

ای خطِ بَلَدِه جماعتِ ايماندارِ شارِ کولسي نوشته شده. کولسي دَ شَرَقِ اِفْسُس دَ تَرْکِيه اِمروزي مَوْقِعِيَت دَشت. پولسِ خِبر شُدُد که دَ مِينکَلِ جماعتِ ايماندارِ کولسي کسای جای گِرِفْتِه که خود ره ايماندارِ مَوگِه ولے نَبِيه. اَمُو کَسَا مَوگُفْت که بَلَدِه شَنِخْتونِ خُدا و نِجَات پَيِدا کِدو تنها ايمان دَشتو دَ مَسِيح بَس نَبِيه، بَلکِه اَرواح و قُدْرَت های روحانی ره ام باید پَرسَتَش کَنی و احکامِ شَرِيَعَت ره ام دَ جای بیری.

پولسِ قَد اَمزِي طَرزِ فِکَرِ مُخَالِفَتِ مُونِه و شَخْصِيَتِ مَسِيح ره بِيان کِده مَوگِيه:

پولسِ دَ حَالِيکِه ايماندارا ره اَمزِي طَرزِ فِکَرِ غَلَطِ باخبر مَوکُنِه، اَمچُنان

اونا ره تشويق مونه كه زندگي خو ره مطابق تعليم عيسي مسيح پيش بُره.

امي خط ره پولس د بِندي خانه نوشته كده از دست تيخيكاس و
اونيسيموس د كولسي ربي كد.

فهرستِ عنوانها

دُعا و سلام (فصل ۱ آيه ۱)

شكرگزارى و دُعا (۳:۱)

شخصيت و بزرگي مسيح (۱۵:۱)

زحمتاي پولس بلده جماعت ايماندارا (۲۴:۱)

آزادى ايمانداراي مسيح از رسم-و-رواجاي دنيايي (۶:۲)

اصول و مقررات زندگي روحاني (۱:۳)

مَقَرَّاتِ بَلَدِهِ رَابِطَهُ خَانَوَارِ مَسِيحِي (١٨:٣)

سَلامِ هَايِ آخِرِي (٧:٤)

دُعَا وَ سَلامِ

١) از طرفِ پوُلُسِ كِه دَ خاست-و-إرادِهِ خُدا رَسُولِ مَسِيحِ عِيسَى
أَسْتَه وَ از طرفِ بَرارِ مَو تيموتائوس، ٢) بَلَدِهِ بَرارونِ مُقَدَّسِ وَ وفادارِ كِه دَ
مَسِيحِ تَعَلُّقِ دَرَه وَ دَ شارِ كَوَلُوسِي أَسْتَه: فَيِضِ وَ سَلامَتِي آتِه مَو خُدا نَصيبِ
شُمُو شُنَه.

شُكْرُگُزاري وَ دُعَا

٣) مَو هَميشَه وَخَتِيكِه بَلَدِهِ شُمُو دُعَا مُونِي، خُدا رَه كِه آتِه مَوْلَايِ مَو
عِيسَى مَسِيحِ أَسْتَه شُكْر-وَ-سِپاسِ مَوگِي، ٤) چُونِ مَو دَ بارَه ايمانِ شُمُو دَ
عِيسَى مَسِيحِ وَ دَ بارَه مُحَبَّتِي كِه بَلَدِهِ تَمَامِ مُقَدَّسِينِ دَرِيدِ شَنِيدِے. ٥)

ایمان و مُحَبَّتِ شُمُو بخاطرِ اُمیدی آسته که دَ عالمِ باله بلده شُمُو نِگاه شُدِه
 و شُمُو از گاه دَ باره شی از کلامِ حقیقت یعنی از خوشخبری ⑥ که دَز
 شُمُو رسیده شنیدید. اُمُو رقم که خوشخبری دَ تمامِ دُنیا ثمر دده رُشد مونه،
 اُمُو رقم دَ مینکل از شُمُو ام از روزی که اُو ره شنیدید و فیضِ خُدا ره دَ
 راستی پی بُردید، ثمر دده رُشد مونه. ⑦ شُمُو اُو ره از ایپراس یاد
 گرفتید، از همکارِ عزیز مو و خدمتگارِ وفادارِ عیسیٰ مسیح که از طرفِ
 ازمو آسته. ⑧ اُو ام از مُحَبَّتِ شُمُو که دَ وسیله روحِ اَلْقُدس بخشیده
 شُدِه، دَز مو خبر دد.

⑨ امزی خاطر از روزی که مو ای ره شنیدے، مو دوامدار بلده شُمُو
 دُعا مونی و از خُدا میخاهی که شُمُو دَ وسیله هر حکمت و فامیدگی
 روحانی از شناختِ خاست-و-اراده ازو لبریز شنید ⑩ تا بطوری رفتار کُنید
 که لایقِ مولا آسته و اُو ره کاملاً خوشحال مونه و تا دَ هر عملِ نیک پُرثمر
 بشید و دَ شناختِ خُدا رُشد کُنید. ⑪ مو دُعا مونی که قد تمامِ قوتی که
 از قدرتِ پُر جلالِ ازو مییه، قوی شنید تا صبر و تَحْمَلِ کَلو دشته بشید و قد
 خوشی ⑫ از آته آسمانی شکرگزاری کُنید که اُو شُمُو ره لایقِ ازی دِنست
 که دَ میراثِ مُقَدَّسین دَ پادشاهی نُور شریک شنید. ⑬ اُو مو ره از چنگ

قُدْرَتِ تَرِيكِي نِجَاتِ دَد و دَ پادشاهی باچه دوست-دَشْتَنِي خُو اُورِد (۱۴) که دَ
وَسِيْلَه اَزُو مو بازخريد شُدِي و بَخَشِشِ گُناهاِي مو مُهيا شُد.

شَخْصِيَّت و بَزْرگِي مَسِيح

- (۱۵) مَسِيح چِهْرَه خُدای نَادِيده يَه، اوْلبارِي و بَزْرگَتَر از تَمَامِ مَخْلُوقَات،
(۱۶) چِرَاکه دَ وَسِيْلَه اَزُو تَمَامِ چِيْزا دَ اَسْمو و دَ زَمِي خَلْق شُد، چِيْزاي که
دِيْده مُوشَه و دِيْده نَمُوشَه، چِي تَخْتِ هَاي پادشاهِي، چِي مَمْلَكَتَا، چِي
حُكْمَرانَا، چِي قُدْرَتِ هَا؛ اَرَه، تَمَامِ چِيْزا دَ وَسِيْلَه اَزُو و بَلْدَه اَزُو خَلْق شُد.
(۱۷) مَسِيح پِيْش از پِگِ چِيْزا و جُودِ دَشْت و دَ وَسِيْلَه اَزُو پِگِ چِيْزا قَد
يِگْدِيْگِه خُو وَصَلِ اَسْتَه. (۱۸) اُو سَرِ جِسْمِ يَعْني سَرِ جَماعَتِ اِيْماندارَا اَسْتَه؛
اُو اِبْتِدا اَسْتَه، اوْلِيْن كَسِي که از مُرْدَه هَا دُوبارَه زِنْدَه شُد تا دَ تَمَامِ چِيْزا
پِيْش-قَدَمِ بَشَه. (۱۹) چُونِ رِضايِ خُدَا امِي بُوْد که تَمَامِ پُورِي خُو رَه دَ مَسِيح
جاي-دَ جايِ كُنَه (۲۰) و دَ وَسِيْلَه اَزُو تَمَامِ چِيْزا رَه قَد خُو اَشْتِي بِيْده، چِي دَ
اَسْمو، چِي دَ زَمِي. اَرَه، اُو دَ وَسِيْلَه رِيخْتَنْدُونِ خُونِ اَزُو دَ رُويِ صَلِيْبِ،
صَلْح-و-سَلامْتِي رَه دَ و جُودِ اُورِد.

۲۱) شُمو یگ وخت دَ فِکرای خُو دَ خُدا بیگنه و دُشمنون شی بُودید،
 مشغول دَ اعمالِ شیرانه، ۲۲) مگم آلی خُدا دَ وسیله جسمِ بشری مسیح از
 طریقِ مرگِ ازو شُمو ره قد خُو آشتی دده تا شُمو ره مُقدَّس و بے عیب و
 بدونِ ملامتی دَ حُضور خُو بیره، ۲۳) دَ شرطی که دَ ایمان خُو قایم و اُستوار
 منده اِدامه بیدید و از اُمیدی که دَ خوشخبری آسته و شُمو او ره شنیدید،
 دُور نشنیدید. ای اُمو خوشخبری آسته که بلده تمامِ مخلوقات دَ زیرِ آسمو
 اعلان شُده و ما پولس، خدمتگار شی شُدیم.

زَحمتای پولس بلده جماعتِ ایماندارا

۲۴) آلی ما از زَحمتای که بخاطرِ از شُمو میکشُم، خوشحال اَسْتُم و هر
 کِمبُود رنجِ های مسیح ره دَ جسمِ خُو تکمیل مُونُم، بخاطرِ جسمِ ازو یعنی
 بخاطرِ جماعتِ ایماندارا. ۲۵) ما دَ مُطابقِ وظیفه که خُدا بخاطرِ از شُمو دَ
 عَهده مه ایشْت، خدمتگارِ جماعتِ ایماندارا شُدُم تا کلامِ خُدا ره بطورِ کامل
 اعلان کُنُم، ۲۶) یعنی اُمو راز ره که از زمانِ ها و نسلِ ها تاشه مندَد، مگم
 آلی بلده مُقدَّسین شی بَرَملا شُده. ۲۷) خُدا خاست که بلده ازوا معلومدار

کُنه که دَوْلتمندی پُر جلالِ امزی راز دَ مینکل مردُمای غیرِ یهودِ چِیقس
 بزرگ آسته، یعنی ای که مسیح دَ زندگی شُمو آسته، یگ اُمیدِ پُر جلال. ②۸
 و مو پیغامِ مسیح ره اعلان مونی و هر کس ره نصیحت کده قد تمام
 حکمت-و-دانایی تعلیم میدی تا هر کس ره دَ ایمان شی دَ مسیح بالغ کده دَ
 خُدا تقدیم کنی. ②۹ بلده امزی مقصد ما زحمت میکشم و مُطابقِ قُوتِ ازو
 که قدرتمندانه دَ وجود مه کار مونه، تپ-و-تلاش مونم.

۲ ① ما میخایم شُمو بدنید که ما چِیقس بلده از شُمو و بلده
 ایماندارای شارِ لاؤدیکیه و تمام کسای دیگه که تا هنوز مره رُوی دَ رُوی
 ندیده، زحمت میکشم ② تا دل های پگ تشویق شنه و پگ دَ مُحَبَت
 اتحاد-و-اتفاق دشته بشه و تا قد اطمینانِ کامل از تمام دَوْلتمندی فامیدگی
 برخوردار شده شناختِ رازِ خُدا یعنی مسیح ره حاصل کنه، ③ که تمام
 خزانه های حکمت و علم دَ مسیح تاشه آسته. ④ ما ای ره موگم تا هیچ
 کس شُمو ره قد تورای نرم-و-چرب خُو بازی ندیه. ⑤ چُون اگرچه جسماً
 ما از شُمو دور آستم، ولی دَ روح قد شُمو آستم و از دیدونِ نظم-و-ترتیب و
 مُستحکم بُودونِ ایمان شُمو دَ مسیح خوشحال آستم.

آزادی ایماندارای مسیح از رسم-و-رَواج های

دُنیایی

- ⑥ پس اُمُو رَقْم که مسیح عیسیٰ ره بِحَیْثِ مَوْلایِ خُو قَبُول کَدید، اُمُو رَقْم دَ مُطَابِقِ رَاهِ اَزُو رِفْتار کُنید، ⑦ و دَزُو رِیشَه دَوَنده آباَد شُنید؛ و اُمُو رَقْم که تَعْلیمِ گِرَفْتید دَ اِیْمان خُو اُسْتوار شُدِه از حد کَلو شُکرگُزاری کُنید.
- ⑧ اِحْتیاط کُنید که کس شُمو ره قَد فِلْسَفِه پُوچ و گُمره کُننده که مُطَابِقِ رِسم-و-رَواج های اِنسان و مُطَابِقِ اَصُولِ اِبْتدایی ازی دُنیا اَسْتِه اَسیر نَکنه، چرکه ای چیزا مُطَابِقِ تَعْلیمِ مَسیح نِییه. ⑨ چُون تَمَامِ پُوری اِلْهی جِسمًا دَزُو جای گِرَفْتِه ⑩ و شُمو ام که دَزُو تَعْلُقِ دَرید تَکْمیل شُدید. و اُو سِرِ هِر حُکومت و هِر قُدرت اَسْتِه. ⑪ و اَمِچنان، شُمو دَ عِنوانِ اِیْماندارای اَزُو خَتنه شُدید، خَتنه که دَ وِسیلِه دِسْتِ اِنسان اِنجام نَشُد، بَلکه قَد بُر کَدون طَبیعتِ نَفسانی دَ وِسیلِه خَتنه اِنجام شُد که دَ مَسیح تَعْلُقِ دَرِه. ⑫ شُمو دَ وِسیلِه غُسلِ تَعْمید قَد مَسیح دَفن شُدِه دَ وِسیلِه اِیْمان دَ قُدرتِ خُدا که مَسیح ره از مُرده ها دُوباره زنده کد، قَد اَزُو دُوباره زنده ام شُدید. ⑬

وختیکه شُمو دَ خطاها و ناختنګی طبیعتِ نَفسانی خُو مُرده بُودید، خُدا شُمو
ره قد ازو زنده کد، چُون او تمامِ خطاهاى مو ره بخشید (۱۴) و نوشته ره که
قد حُکمِ قانُونی دَ ضِدِ ازمو بُود، باطل کد و او ره دَ صلیب میخکوب کده
از بین بُرد. (۱۵) او حُکمرانا و قُدرت ها ره خلعِ سَلاح کد و اونا ره برَملا
رَسوا کد، چُون او دَ بِلِه ازوا دَ رُوى صلیب پیروز شد.

(۱۶) امزی خاطر نیلید که هیچ کس بخاطرِ خوردنی یا وُچی کدنی یا
عیدها یا ماهِ نو یا روزِ آرام شُمو ره محکوم کُنه. (۱۷) امیا تنها سایه چیزای
امدنی آسته، لیکن اصل دَ مسیح تعلق دَره. (۱۸) نیلید که هیچ کس شُمو ره
از اجر بے نصیب کُنه، یعنی کسای که دَ خار کدونِ جِسم و عِبادتِ ملایکه
ها تاکید مونه و غرقِ رویا های آسته که دیده و دَ وسیله فکرِ انسانی خُو
بے جای مغرور شده. (۱۹) امی کسا دَ سر یعنی دَ مسیح، چسپیده نییه، دَ
حالی که از سر تمامِ جِسم قُوت میگیره و دَ وسیله مَفصل ها و بندها قد
یگدیگه خُو یگجای نگاه موشه و قد رُشدی که از طرفِ خُدا آسته، رُشد
مُوکُنه.

(۲۰) پس اگه شُمو واقِعاً قد مسیح نِسبت دَ اَصُولِ اِبْتدایی ازى دُنیا

مُرْدِيد، چَرَا رَقْمِي زِنْدَگِي مُوْنِيد كِه بُوگِي هِنُوَز دَ دُنْيَا تَعَلُّق دَرِيد و تَابِع مُقَرَّرَاتِي مُوَشِيد كِه مُوگِيه: ^(۲۱) ”اِي رِه دِسْت نَزُو! اُو رِه مَزِه نَكُو! اُو رِه غَرَض نَكِير!“ ^(۲۲) تَمَامِ اَمَزِي چِيَزَا رِه كِه اِسْتِفَادِه كُنِي اَز بَيْنِ مَوْرِه؛ اَمِيَا مُطَابِقِ اِحْكَامِ و تَعْلِيمِ هَايِ اِنْسَانِي اَسْتِه. ^(۲۳) اِگَرچِه اَمِي چِيَزَا بَخَاطِرِ عِبَادَتِ دَاوِطْلَبَانِه، فِرَوْتَنِي ظَاهِرِي و تَپَنْدُونِ جِسْمِ يِگِ ظَاهِرِ عَاقِلَانِه دَرِه، مَكَمِ بَلَدِه اِدَارِه كَدُونِ خَاهِشَاتِ نَفْسَانِي هِيچِ فَايِدِه نَدَرِه.

اَصُول و مُقَرَّرَاتِ زِنْدَگِي رُوْحَانِي

۳ ^(۱) پَسِ بَخَاطِرِي كِه شُمُو قَدِ مَسِيحِ دُوْبَارِه زِنْدِه شُدِيد، دَ طَلَبِ چِيَزَايِ بَشِيدِ كِه دَ عَالَمِ بَالِه يِه، دَ جَايِي كِه مَسِيحِ دَ دِسْتِ رَاسْتِ خُدا شِسْتِه. ^(۲) دَ بَارِه چِيَزَايِ كِه دَ عَالَمِ بَالِه اَسْتِه فِكْرِ كُنِيد، نَه دَ بَارِه چِيَزَايِ كِه دَ رُوِي زَمِي اَسْتِه. ^(۳) چُونِ شُمُو مُرْدِيدِ و زِنْدَگِي شُمُو قَدِ مَسِيحِ دَ سَايِه خُدا تَاشِه يِه. ^(۴) وختِي مَسِيحِ كِه زِنْدَگِي مَو اَسْتِه ظُهْرِ مُونِه، اَوخْتِه شُمُو اَمِ قَدِ اَزُو دَ بَزْرُگِي-و-جَلَالِ ظُهْرِ مُوْنِيد.

۵) امزی خاطر، هر چیزی که د وجود شمو دنیایی آسته، او ره نابود

کنید: زنا، ناپاکی، هوی-و-هوس، خواهشات شیرانه و حرص ره که بت

پرستی آسته. ۶) بخاطر امزی چیزا قار-و-غضب خدا د بله مردمای

نافرمان نازل موشه. ۷) شمو ام یگ زمان د امزی راه ها قدم میزدید،

وختیکه د مطابق ازوا رفتار موكدید. ۸) لیکن آلی پگ امزی چیزا ره ایله

بدید، یعنی قار، غضب، کینه و تهمت زدو ره؛ و امچنان تورای زشت ره از

دان خو دور کنید. ۹) د یگدیگه خو دروغ نکید، چراکه شمو طبیعت کهنه

ره قد اعمال شی قتی از خود دور کدید ۱۰) و خود ره قد طبیعت نو

پوشندید که د شناخت تازه شده موره، تا هم رنگ خالق خو شنه. ۱۱) د

امزی طبیعت نو د بین یونانی و یهودی، ختنه-شده و ناختنه، بربری و

سکیتی و د بین غلام و آزاد فرق نییه، بلکه مسیح تمام چیز آسته و د پگ

وجود دره.

۱۲) پس رقم انتخاب شده های مقدس و دوست-دشتنی خدا خودون ره

قد دلسوزی، مهربانی، فروتنی، ملایمت و صبر-و-حوصله بیوشنید. ۱۳)

یگدیگه خو ره تحمل کنید و اگه کدم شمو از دیگه خو گله داشته بشید،

یگدیگه خو ره ببخشید. امو رقم که مولا شمو ره ببخشید، امو رقم شمو ام

یگدیگه خو ره بۇخشید. ١٣ د بله پگ امزیا مُحَبَت ره بپوشید که تکمیل کونده تمام چیزا آسته. ١٥ بیلید که آرامشِ مسیح د دل های شمو حُکمرانی کنه، چراکه شمو بلده امزی مقصد د یگ جسم کوی شُدید؛ و شکرگزار بشید. ١٦ بیلید که کلامِ مسیح قد آرزش بے اندازه خو د وجود شمو جای بگیریه؛ یگدیگه خو ره قد حکمتِ کاملِ تعلیمِ بدید و نصیحتِ کُنید. قد زبور خاندو، حمد-و-ثنا و سرود های روحانی د وسیله فیضی که د دل های شمو آسته، خدا ره ستایش کُنید. ١٧ و هر چیزی ره که انجام میدید، چی د گفتار، چی د کردار، تمام شی ره د نامِ مولا عیسیٰ انجام بدید و د وسیله ازو خدا یعنی آته آسمانی ره شکر-و-سپاس بگید.

مَقَرَاتِ بَلَدِه رَابِطِه خَانَوَارِ مَسِيحِي

١٨ آی خاتونو، تابع شویون خو بشید، امو رقم که د نظرِ مولا مناسب آسته. ١٩ آی شوی ها، خاتونوی خو ره مُحَبَت کُنید و قد ازوا اوقات تلخی نکُنید. ٢٠ آی بچکیچا، از آته-و-آبه خو د هر کار اطاعت کُنید، چراکه ای کار موردِ پسندِ مولا آسته. ٢١ آی آتهگو، بچکیچای خو ره سر

قار نَكْنِيد، نَشْنَه كه اُونَا دِل-مِيدَه شُنَه.

٢٢) آي غُلَامَا، از باداراي جِسْمَانِي خُو دَ هر كار اِطَاعَت كُنِيد، نَه تنها
وختِيكه زيرِ نظرِ اَسْتِيد رَقْمِ كَسَاي كه رِضَايَتِ اِنْسَان ره طَلَب مُونَه، بَلَكِه از
تِي دِل اِطَاعَت كُنِيد و از مَوْلَا بَتَرَسِيد. ٢٣) هر كاري ره كه انجام مِيدِيد از
دِل-و-جان انجام بَدِيد رَقْمِي كه بُوگِي بَلَدِه مَوْلَا كار مُونِيد، نَه بَلَدِه اِنْسَان.
٢٤) چُون شُمُو مِيدَنِيد كه از مَوْلَا يگ مِيرَاث دَ عِنْوَانِ اَجْر دَ دِسْت مِيرِيد،
چراكه شُمُو مَوْلَا مَسِيح ره خِدْمَت مُونِيد. ٢٥) هر كس كه بَد كُنَه، سَزَاي
بَدِي ره كه كده مِينِگره و دَ پِيشِ خُدا طَرَفْدَارِي وُجُود نَدَرَه.

٤ ١) آي بادارا، قَد غُلَامَايِ خُو عَادِلَانَه و دَ اِنصاف رِفْتار كُنِيد،
چُون شُمُو مِيدَنِيد كه شُمُو ام دَ عَالَمِ بَالَه يگ بادار دَرِيد.

٢) دَ دُعَا پايبند بَشِيد و مُتَوَجِه بَشِيد كه قَد شُكْرگُزاري قَتِي بَشَه. ٣)
و دَ عَيْنِ وخت بَلَدِه ازمو ام دُعَا كُنِيد كه خُدا يگ درگه ره بَلَدِه رَسَنْدُون
كلام واز كُنَه تا مو بَتَنِي رازِ مَسِيح ره اِعلان كُنِي كه ما بخاطر شِي بَنَدِي
اَسْتُم. ٤) دُعَا كُنِيد كه ما امي راز ره بَطُورِ وَاضِحِ بَرَمَلَا كُنْم، اَمُو رَقْمِ كه

بلده مه فرض آسته. ⑤ د برابر کسای که از برو آسته عاقلانه رفتار کده
امزو فرصت خوب استفاده کُنید. ⑥ گفتگوی شمو همیشه پُرفیض و
سنجیده بشه تا بدنید که د هر کس چی رقم جواب بَدید.

سلام های آخری

⑦ تیخیکاس شمو ره از تمام احوال مه باخبر مونه. او برار عزیز،
خدمتگار وفادار و همکار مه د خدمت مولا آسته. ⑧ ما او ره بلده امزی
مقصد د پیش شمو ربی مونم که شمو از احوال مو باخبر شنید و تا او شمو
ره دل-جمی بدیه. ⑨ او ره قد اونیسیمس، برار وفادار و دوست-دشتنی مو
که یکی از شمو آسته، قتی ربی مونم. اونا د باره تمام چیزای که د اینجی
رُخ میدیه بلده شمو مَوگیه.

⑩ ارسترخُس که قد ازمه یگجای بندی آسته و مرقس باچه کاکای
برنابا شمو ره سلام مَوگیه. د باره مرقس بلده شمو هدایت دده بُوْدَم که هر
وخت او د پیش شمو آمد از شی پذیرایی کُنید. ⑪ و یسوع که د نام

یوستس یاد موشه، ام شمو ره سلام مَوگیه. تنها اینمیا از جم یهودیا د مینکل همکارای مه آسته که بلده پادشاهی خُدا کار مونه و امیا باعِث آرامش مه شُده. ^(۱۲) ایپفراس که یکی از شمو و خِدمتگارِ مسیح عیسی آسته، شمو ره سلام مَوگیه. او همیشه د دُعاهای خُو بلده شمو جدی دُعا مونه تا د ایمان بالغ شنیید و د پی بُردونِ تمام خاست-و-اراده خُدا کاملاً مُتقیقین شنیید. ^(۱۳) ما د باره ازو شاهدی میدیم که او بخاطر از شمو و ایماندارای لائودیکیه و هیراپولیس غدر زحمت میکشه. ^(۱۴) لوقا طیب دوست-دشتنی و دیماس شمو ره سلام مَوگیه.

^(۱۵) بلده برارونی که د لائودیکیه آسته و بلده خوار مو نیمفا و جماعتِ ایماندارا که د خانه شی آسته، سلام های مَره برسینید. ^(۱۶) وختیکه ای خط بلده شمو خنده شد، توخ کُنید که بلده جماعتِ ایماندارای لائودیکیه ام خنده شنه و شمو ام خطی ره که بلده لائودیکیه نوشته شده بخانید. ^(۱۷) د آرخیپس بُگید: ”توخ کُو، خِدمتی که د راهِ مولا دز تو دده شُده، او ره تکمیل کنی.“

^(۱۸) ما پولس، امی دُعا-و-سلام ره قد دستِ خود خُو نوشته کدیم. د یاد

دشته بشید که ما بندی استم. فیض نصیب شمو شنه. [آمین.]